

SCRIPT OF EVENING GOJRI NEWS BULLETIN 25

AUG 1700 HRS

ایونینگ گو جری نیوز بلیٹن مورخہ 25 اگست 2025

یوہ آکا شوانی جموں ہے محمد اشفاق تے نصرت چوہدری تیں خبر سنو۔

HEADLINES

۱. وزیر اعلیٰ عمر عبداللہ نے کہیو ہے جے اُمید کی جارہی ہے جے عدالت عظمیٰ جموں کشمیر غو ریاستی درجو بحال کرن خاطر جلد ایک آخری تاریخ مقرر کرے گی۔
۲. ضلع پونچھ مانہ قبضہ لکیر گے کول کال علاقہ مانہ پاکستان غی طرفوں نصف درجن ڈرون پیجن توں بعد حفاظتی دستاں نے تلاشی کاروائی شروع کی ہے۔
۳. جل شکتی غا وزیر جاوید احمد رانا نے اج اوڑی ہونیار مانہ دریا جہلم گے کول کال علاقہ نانہ سیلاب توں محفوظ رکھن خاطر ایک پروجیکٹ گو سنگ بنیاد رکھیو۔
۴. حساس معلومات تے ڈاٹا نانہ محفوظ رکھن خاطر جموں کشمیر سرکار نے ایک حکم نامو جاری کرتا واں تمام سرکاری دفتراں مانہ یو ایس بی تے پین ڈرائیوز گا استعمال ور پابندی لادتی ہے۔

۵. محکمہ موسمیات نے بالائی علاقہ مانہ 27 اگست توڑی شدید بارشیں سنگ سیلاب تے پسی وغیرہ پین کی پیش گوئی کی ہے تے اس زمن مانہ پلک تمام سرکاری ت نجی سکول بند رکھیا جیں گا۔

CM STATEHOOD

وزیر اعلیٰ عمر عبداللہ نے اج کہیو ہے جے عدالت عظمیٰ جموں کشمیر گو ریاست گو درجو بحال کرن خاطر ایک آخری تاریخ مقرر کرے گی جناب عمر نے مزید کہیو ہے جہ یاه بڑی بد قسمتی کی گل ہے جے عدالت عظمیٰ 10 اکتوبر توں پہلاں اس معاملہ کی ساعت خاطر تیار ہے میڈیا سنگ خطاب کرتا واں جناب عمر نے کہیو ہے جے ہم اُمید کراں جت عدالت عظمیٰ ریاست گا درجہ کی بحالی خاطر جلد ایک تاریخ مقرر کرگے ریاست گو درجو بحال کرے گی اس بارے بولتا واں اُنہاں نے اس طرح کہیو۔ واضح رہے جے اس توں پہلاں عمر عبداللہ نے شیر کشمیر بین الاقوامی کانفرنس مرکز سرینگر مانہ برادریاں نانہ باختیار بنان خاطر تے اُن کی فلاح وبہبود بارے ایک تقریب مانہ شرکت کی اس موقع ور اُنہاں نے نمائش گو افتتاح کرتا واں خواتین تے پسماندہ افراد واسطے قرضان کی منظوری دتی تے نال ہی معزور افراد نانہ ضروری امدادی سامان تے سکوٹی پیش کی گئیں اس زمن مانہ مزید بولتا واں جناب عمر نے حکومت گا عزم نانہ دہرایو ہے۔

UDH AWARENESS PROG

محکمہ سماجی فلاح وبہبود ادھمپور غی طرفوں اج ڈی سی آفس مانہ آگاہی تے تقسیم بارے کیمپ منعقد کیو گیو یوہ پروگرام ان ہی تقریبات غو حصو تھو جہیڑو اج سرینگر مانہ وی ہوو مانہ وزیر اعلیٰ عمر عبداللہ مہمان خصوصی تھا۔ اس موقع ور پورا جموں کشمیر مانہ 547 تے پہیاں آلی سائل تقسیم کی گئی ادھمپور غا پروگرام مانہ ڈپٹی کمشنر سلونی رائے مہمان خصوصی تھیں تے ضلع غا 4 ہور اسمبلی ممبر وی ات

موجود تھا۔ تقریب غے دوران ضلع ادهمپور غا خصوصی ضرورت مند معازوران نانہہ 23 ترے
پہیاں آلی موٹر سائکل دتی گئی۔

DRONE SIGHTED

حفاظتی دستاں نے اج ضلع پونچھ مانہہ قبضہ لکیر گے کول کال آلا علاقاں مانہہ
پاکستان گی طرفوں قریب نصف درجن ڈرون بیھجیا جان توں بعد تلاشی کاروائی شروع
کی۔ مہارا آکاشوانی گا نامہ نگار نے خبر ٹوری ہے جے گزری رات مینڈر سیکٹر گا بالا
کوٹ لنگوٹ تے گرسائی نالہ آلا علاقہ مانہہ ڈرون سرگرمی دیکھی گئی شبہ کیو
جاری ہے جے یہ ڈرون نگران خاطر پیجھیا گیا تھا جد کہ کُجھ ویلا گا گشت تیں بعد
سرحد گے اُس پار واپس ہو گیا جس تیں بعد حفاظتی دستاں نے علاقہ مانہہ تلاشی
کاروائی شروع کی تانجے منشیات یا کسے وی قسم گا ہتھیار یا نقصان دہ اشیاء نانہہ
تلاش کر گے ناکاری بنایو جاسکے تے حکام نے اس ڈرون سرگرمی نانہہ سنگین حفاظتی
تشویش گا طور ور دیکھ رئی ہے۔

RANA FOUNDATION

جل شکتی گا وزیر جاوید احمد رانا نے جامع فلڈ منجیمٹ پروگرام گے تحت بونیار اوڑی
م، نانہہ دریا جہلم سنگ زمینی کٹاؤ تے سیلاب توں بچن بارے کم کاج گو سنگ بنیاد رکھیو
ہے اس بڑی پیش رفت گے تحت آرسی سی دیوار تے کریٹ جیسا مضبوط ڈھانچہ تیار کیا
جیں گا جن سنگ مقامی آبادی نانہہ سیلاب گی پریشانی توں بچایو جاسکے غو۔

USB/PEN DRIVES BAN

سائبر سکیورٹی نانہہ مضبوط بنان تے حساس سرکاری معلومات نانہہ محفوظ رکھن
واسطے جموں کشمیر حکومت نے تمام سرکاری محکماں مانہہ یو ایس بی تے پین
ڈرائیوز غا استعمال ور فوری پابندی عائد کی ہے یوہ حکم محکمہ عمومی انتظامیہ
نے جاری کیو ہے جہڑو سول سیکرٹریٹ ضلع دفتر تے دیگر انتظامی یونٹاں ور لاگو
وے غو۔ حکومت نے ہدایت دتی ہے کہ تمام محکمہ ہن معلومات نانہہ محفوظ کرن تے
ویب سائٹ غو استعمال کریں غا۔ اگر <http://govdrive.gov.in> سانجھ کرن واسطے
کسے نانہہ پین ڈرائیو استعمال کرن غی ضرورت ہے تاں فوری طور ور اجازت لازمی
وے غی حکم نامہ غے مطابق اگر کوئی اہلکار اس غی خلاف ورزی کرے تاں اُس غے
خلاف سخت کاروائی کی جے غی۔

KV RAMKOTE PROG

ایک اہم تعلیمی فیصلہ غے تحت کیندر ودیالیہ سنگاٹھن نے کٹھوعی ضلع غا رام کوٹ
مانہہ کیندر ودیالیہ غو تعلیمی سیشن اس سال تیں شروع کرن غی منظوری دے دتی
ہے مرکزی وزیر ڈاکٹر جتندر سنگھ نے اس فیصلہ ور خوشی غو اظہار کرتاواں کہیو
کہ عوام غو پُرانو مطالبو آخر کار پورو ہوو ہے جہڑو مقامی نمائنداں غی مسلسل کوششاں
تے ممبر اسمبلی ستیش شرما غی پیروی تیں ممکن ہوو ہے انہاں نے اس منظوری نانہہ
خطہ مانہہ معیاری تعلیم توڑی رسانی نانہہ بدھان غی ایک بڑی کامیابی قرار دتو ہے۔

RAMBAN SERI DEPT

ریشم غا محکمہ رام بن نے مقامی کساناں نانہہ ریشم غی کاشت مانہہ شامل کرن واسطے بڑی کوشش شروع کی ہے خاص طور ور بے زمین تے قبائلی برادریاں غے نال نال خواتین نانہہ وی اس مانہہ شامل کیو جارہیو ہے محکمہ باقاعدگی غ نال ضلع مانہہ بیداری پروگرام منعقد کر رہیو ہے جہیڑو اکثر سینٹرل سلک بورڈ غی مہم میرو ریشم میرو فخر غے نال مل غے کیو جے ان پروگراماں مانہہ کساناں نانہہ جدید طریقاں بیماری تیں بچاو تے بہتر پیداوار غا طریقہ سکھایا جی۔ تانجے کوکون غی پیداوار بدھ تے کساناں غی آمدنی بہتر وے۔ ان سرگرمی مانہہ سیری کلچر غا ڈائریکٹر ریشم بارے فارم غو دورو کریں گا تانجے زیادہ تیں زیادہ کساناں نانہہ اس سنگ جوڑ سکیں۔

WEATHER

محکمہ موسمیات نے پیش گوئی کی ہے جے جموں غا کئی علاقاں مانہہ ہلکی تیں درمیانی بارش تے گرج چنک وے گی جد کہ بعض مقامات ور پاری تیں شدید بارش ہو سکے جن مانہہ ریاسی ادھمپور سانہہ کٹھوے تے راجوری وی شامل ہیں اسے دوران درمیانی تیں شدید بارشاں نے پونچھ رام بن ڈوڈہ کشتواڑ وادی کشمیر غا کُج حصاں نانہہ متاثر کی وے عہدے داراں نے رہنمائیاں نانہہ ہدایت دتی ہے جے وے چوکس رہیں تے ضروری احتیاطی تدابیر اختیار کریں خاص طور ور اُن علاقاں مانہہ جہڑہ سیلاب تیں متاثر تے نشستیں ہیں کیونجے خطہ مانہہ مونسون غی ہل چل جاری ہے۔ یاد رہ جے خراب موسم غے پیش نظر اج صوبہ جموں مانہہ تمام سرکاری تے نجی اسکول بند رکھیا گیا ہیں تے پلک وی تمام سکول بند ریں غا۔ اس زمن مانہہ محکمہ موسمیات نے دسیو جے 27 اگست توڑی بالائی علاقاں مانہہ بادل پھٹن تے تیز بارشاں سنگ پسی وغیرہ آن گا امکان ہیں۔

PTC ANN

علاقائی خبراں آلا شعبہ آکاشوانی جموں غی طرفوں ضلع جموں واسطے عارضی نامہ نگاراں یعنی پی ٹی سی واسطے درخواست منگی گئی ہیں۔ مجوزہ پرفارم ور عارضی نامہ نگار غی پوسٹ مانہہ دلچسپی رکھن آلا ایسا امیدوار درخواست دے سکیں گا جہیڑا ضلع جموں گا بسنیک ویں تے اُن غی عمر 24 براں تیں 50 براں غے بشکار وے۔ پی ٹی سی غی اس پوسٹ واسطے تعلیمی قابلیت پی جی ڈپلومہ یا صحافت غا شعبہ مانہہ ڈگری یا فر تسلیم شدہ یونیورسٹی تیں گرجویشن غے ہمراہ 2 براں غو صحافت مانہہ تجربو مقرر کیو گیو ہے۔ اس تیں علاوہ کمپیوٹر تے ورڈ پروسیسنگ نالے خبر اکٹھی کرن آلا آلات تے میڈیا کوریج مانہہ تجربو وی ضروری ہے۔ عارضی نامہ نگار غی پوسٹ مانہہ دلچسپی رکھن آلا امیدوار واسطے لازمی ہے جے ضلع صدر دفتر جموں یا اس تیں 10 کلو میٹر غا دائرہ غے اندر رہائش پزیر وے اس سلسلہ مانہہ درخواست غی بارڈ کاپی ضروری دستاویزات غے ہمراہ ہیڈ ریجنل نیوز یونٹ آکاشوانی پنچترتھی جموں مانہہ بڑاں خود آئندہ 31 اگست 2025 توڑی دے سکیں۔ اس بارے مزید جانکاری ویب سائٹ

ور دستیاب ہے۔ www.newsonair.gov.in
